

四庫全書

集部

欽定四庫全書

集部

元氏長慶集卷二

詳校官監察御史_臣查瑩

檢討_臣何思鈞覆勘

總校官知縣_臣繆琪

校對官中書_臣雷純

謄錄監生_臣陳山琨

欽定四庫全書

集部二

元氏長慶集

別集類一 唐

提要

臣等謹案元氏長慶集六十卷補遺六卷唐
元稹撰稹爵里事迹具唐書本傳考稹與白
居易書稱河東李明府景儉在江陵時僻好
僕詩章僕因撰成卷軸其中有旨意可觀而
詞近古往者為古諷意可觀而流在樂府者

為樂諷詞雖近古而止于吟寫性情者為古
體詞寔樂流而止于模象物色者為新題樂
府聲勢沿順屬對穩切者為律詩仍以五七
言為兩體其中有稍存寄興與諷為流者為
律諷又稱有悼亡詩數十首絕詩百餘首自
十六歲時至元和七年有詩八百餘首成二
十卷又稱昨巴南道中有詩五十一首文書
中得七年以後所作二百篇然則禠三十七

歲之時已有詩千餘首唐書本傳稱稹卒時
五十三其後十六年中又不知所作凡幾矣
白居易作稹墓誌稱著文一百卷題曰元氏
長慶集唐書藝文志又載有小集十卷然原
本已闕佚不傳此本為宋宣和甲辰建安劉
麟所傳明松江馬元調重刊而卷帙與舊說
不符即標目亦與所自序迥異不知為何人
所重編前有麟序稱稹文雖盛傳一時厥後

浸以不顯惟嗜書者時時傳錄其先人嘗手
自抄寫謹募工刻行云云則麟及其父均未
嘗有所增損蓋在北宋即僅有此殘本爾乾
隆四十四年九月恭校上

總纂官臣紀昀臣陸錫熊臣孫士毅

總校官臣陸費墀

元氏長慶集原序

新唐書藝文志載其當時君臣所撰著文集篇目甚多
太宗集四十卷至武后垂拱集一百卷今皆弗傳其餘
名公鉅人之文所傳蓋十一二爾如梁范文類會昌一
品鳳池橐草笠澤叢書經緯穴餘遺榮霧居見於集錄
所稱道者毋慮數百家今之所見者僅十數家而已以
是知唐人之文亡逸者多矣嗚呼樵夫牧叟詭異怪誕
之說鬼神幻惑不根之言時時萃為一書以詒好事者

觀覽至於士君子道德仁義之文經國濟時之論乃或
沉沒無聞豈不惜哉元微之有盛名於元和長慶間觀
其所論奏莫不切當時務詔誥歌詞自成一家非大手
筆曷臻是哉其文雖盛傳一時厥後浸亦不顯唯嗜書
者時時傳錄不亦甚可惜乎僕之先子尤愛其文嘗手
自抄寫曉夕玩味稱歎不已蓋惜其文之工而傳之不
久且遠也迺者因閱手澤悲不自勝謹募工刻行庶幾
元氏之文因先子復傳於世斯文舊亡其序第冠以新

唐書微之本傳則微之之於文其所造之淺深可槩見
矣宣和甲辰仲夏晦日建安劉麟撰

欽定四庫全書

原序

欽定四庫全書

元氏長慶集卷一

唐 元稹 撰

古詩

思歸樂

山中思歸樂盡作思歸鳴爾是此山鳥安得失鄉名應
緣此山路自古離人征陰愁感和氣俾爾從此生我雖
失鄉去我無失鄉情悵舒在方寸寵辱將何驚浮生居

大塊尋丈可寄形身安即形樂豈獨樂咸京命者道之本死者天之平安問遠與近何言殤與彭君看趙工部八十支體輕交州二十載一到長安城長安不須更復作交州行交州又累歲移鎮值江陵歸朝新天子濟濟為上卿肌膚無瘡色飲食康且寧長安如晝夜死者如實星喪車四門出何關炎瘴繁況我三十餘百年未半程江陵道途近楚俗雲水清遐想玉泉寺久聞峴山亭此去盡綿歷豈無心賞并紅餐日充腹碧澗朝析醅釀

酒待賓客寄書安弟兄閒窮四聲韻悶閱九部經身外
皆委順眼前隨所營此意久已定誰能苟求榮所以官
甚小不畏權勢傾傾心豈不易巧詐神之刑萬物有本
性況復人至靈金埋無土色玉墜無瓦聲劒折有寸利
鏡破有片明我可俘為囚我可刃為兵我心終不死金
石貫以誠此誠患不立雖困道亦亨微哉滿山鳥叫噪
何足聽

春鳩

春鳩與百舌音響詎同年如何一時語俱得春風憐猶
知造物意當春不生蟬免教爭叫噪沸渭桃花前

春蟬

我自東歸日厭苦春鳩聲作詩憐化工不遺春蟬生及
來商山道山深氣不平春秋兩相似虫豸百種鳴風松
不成韻蜩螗沸如羹豈無朝陽鳳羞與微物爭安得天
上雨奔渾河海傾蕩滌反時氣然後好晴明

兔絲

人生莫依倚
依倚事不成
君看兔絲蔓
依倚榛與荆
荆榛易蒙密
百鳥撩亂鳴
下有狐兔穴
奔走亦縱橫
稚童斫將去
桑蔓與之并
翳薈生可恥
束縛死無名
桂樹月中出
珊瑚石上生
俊鶻度海食
應龍升天行
靈物本特達
不復相纏縈
纏縈竟何者
荆棘與飛莖

古社

古社基趾在人散
社不神唯有空心樹
妖狐藏魅人狐惑
意顛倒臊腥不復聞
丘墳變成郭
花草仍荆榛
良田

千萬頃占作天荒田主人議芟斫怪見不敢前那言空
山燒夜隨風馬奔壯聲鼓輦震高焰旗幟翻逡巡荆棘
盡狐兔無子孫孤死魅人滅煙消壇墠存繞壇舊田地
給授有等倫農收村落盛社樹新團圓社公千萬歲永
保村中民

松樹

華山高幢幢上有高高松株株遙各各葉葉相重重槐
樹夾道植枝葉俱冥蒙既無貞直幹復有胥音緝挂蟲何

不種松樹種之搖清風秦時已曾種顛顚種不供可憐
孤松意不與槐樹同間在高山頂樛盤虬與龍屈為大
厦棟庇廕侯與公不肯作行伍俱在塵土中

芳樹

芳樹已寥落孤英尤可嘉可憐團圓葉蓋覆深深花遊
蜂競鑽刺闔雀亦紛拏天生細碎物不愛好光華非無
殲殄法念爾有生涯春雷一聲發驚燕亦驚蛇清池養
神蔡已復長蝦蟆雨露貴平施吾其春草芽

桐花

隴月上山館紫桐垂好陰可憐暗澹色無人知此心舜
沒蒼梧野鳳歸丹穴岑遺落在人世光華那復深年年
怨春意不競桃杏林惟占清明後牡丹還復侵況此空
館閉云誰恣幽尋徒煩鳥噪集不語山嶽岑滿院青苔
地一樹蓮花簪自開還自落暗芳終暗沈爾生不得所
我願裁為琴安置君王側調和元首音安問宮徵角先
辯雅鄭淫宮絃春以君君若春日臨商絃廉以臣臣作

旱天霖人安角聲暢人困鬪不任羽以類萬物祇物神
不歆徵以節百事奉事罔不欽五者苟不亂天命乃可
忱君若問孝理彈作梁山吟君若事宗廟拊以和球琳
君若不好諫願獻觸疏箴君若不罷獵請聽荒于禽君
若侈臺殿雍門可霑襟君若傲賢雋鹿鳴有食芩君聞
祈招什車馬勿騷騷君若欲敗度中有式如金君聞薰
風操志氣在悒悒中有阜財語勿受來獻縣北里當絕
聽禍莫大於姪南風苟不競無往遺之擒姦聲不入耳

巧言寧孔士臬音亦云革安得沴與稷天子既穆穆羣
材亦森森劒士還農野絲人歸織絰丹鳳巢阿閣文魚
遊碧潯和氣決寰海易若漑蹄涔改張乃可鼓此語無
古今非琴獨能爾事有論因針感爾桐花意聞怨香難
禁待我持斤斧置君為大琛

雉媒

雙雉在野時可憐同嗜欲毛衣前後成一種文章足一
雉獨先飛衝開芳草綠網羅幽草中暗被潛羈束剪刀

摧六翮絲線縫雙目啖養能幾時依然已馴熟都無舊
性靈迺與他心腹置在芳草中翻令誘同族前時相失
者思君意彌篤朝朝舊處飛往往巢邊哭今朝樹上啼
哀音斷還續遠見爾文章知君草中伏和鳴忽相召鼓
翅遙相矚畏我未肯來又啄翳前粟斂翮遠投君飛馳
勢奔蹙胃挂在君前向君聲促促信君決無疑不道君
相覆自恨飛太高踈羅偶然觸看看架上鷹擬食無罪
肉君意定何如依舊彫籠宿

箭鏃

箭鏃本求利淬礪良甚難礪將何所用礪以射凶殘不
礪射不入不射人不妥為盜即當射寧問私與官夜射
官中盜中之血闌干帶箭君前訴君王悄不歡頃曾為
盜者百箭中心攢競將兒女淚滴漑助辛酸君王責良
帥此禍誰為端帥言發矧罪不使刃稍利君王不忍殺
遂之如迸丸仍令後來箭盡可頭團團發矧去雖遠礪
鏃心不闌會射蛟螭盡舟行無惡瀾

賽神

村落事妖神林木大如村事來三十載巫覡傳子孫村
中四時祭殺盡雞與豚主人不堪命積燎曾欲燔旋風
天地轉急雨江河翻採薪持斧者棄斧縱橫奔山深多
掩映僅免鯨鯢吞主人集隣里各各持酒罇廟中再三
拜願得禾稼存去年大巫死小覡又妖言邑中神明宰
有意効西門焚除計未決伺者迭乘軒廟深荆棘厚但
見狐兔蹲巫言小神變可驗牛馬蕃邑吏齊進說幸勿

禍鄉原踰年計不定縣聽良亦煩涉夏祭時至因令修
四垣憂虞神憤恨玉帛意彌敦我来神廟下簫鼓正喧
喧因言遣妖術滅絕由本根主人中罷舞許我重疊論
蜉蝣生濕處鴟鵂集黃昏主人邪心起氣焰日夜繁狐
狸得蹊徑潛穴主人園腥臊齧左右然後託丘樊歲深
樹成就曲直可輪轅幽妖盡依倚萬怪之所屯主人一
心好四面無籬藩命樵執斤斧怪木寧遽髡主人且傾
聽再為諭清渾阿膠在末汭罔象游上源靈藥逡巡盡

黑波朝夕噴神龍厭流濁先伐鼉與鼃鼃鼃在龍穴妖
氣常鬱溫主人惡淫祀先去邪與昏昏邪中人意蠱禍
蝕精魂德勝妖不作勢強威亦尊計窮然後賽後賽復
何恩

大觜鳥

陽鳥有二類觜白者名慈求食哺慈母因以此名之飲
啄頗廉儉音響亦柔雌百巢同一樹栖宿不復疑得食
先返哺一身長苦羸緣知五常性翻被衆禽欺其一觜

大者攫搏性貪癡有力強如鵠有爪利如錐音聲甚呖

於交切
姪聲

喙

烏或切

潛通妖怪詞受日餘光庇終天無死期

翱翔富人屋栖息屋前枝巫言此鳥至財產日豐宜主人一心惑誘引不知疲轉見鳥來集自言家轉孳白鶴門外養花鷹架上維專聽鳥喜怒信受若神龜舉家同此意彈射不復施往往清池側却令鵝鷺隨羣鳥飽梁肉毛羽色澤滋遠近恣所往貪殘無不為巢禽攫離卵廐馬啄瘡殘滲瀝脂膏盡鳳皇那得知主人一朝病爭

向屋簷窺呦囀

雄鳴也
以結切

呼羣鵬翩翻集怪鴟主人偏養

者嘯聚最奔馳夜半仍驚噪鵙

音鵙
音鵙

逐老狸主人病

心怯燈火夜深移左右雖無語奄然皆淚垂平明天出

日陰翳走參差烏來屋簷上又惑主人兜兜即富家業

翫好方愛奇占募能言鳥置者許高貲隴樹巢鸚鵡言

語好光儀美人傾心獻彫籠身自持求者臨軒坐置在

白玉墀先問烏中苦便言烏若斯衆烏齊搏鏢翠羽幾

離披遠擲千餘里美人情亦衰舉家憊此患事烏踰昔

時向言池上鷺啄肉寢其皮夜漏天終曉陰雲風定吹
况爾烏何者數極不知危會結彌天網盡取一無遺常
令阿閣上宛宛宿長離

分水嶺

崔嵬分水嶺高下與雲平上有分流水東西隨勢傾朝
同一源出暮隔千里情風雨各自異波瀾相背驚勢高
競奔注勢曲已迴縈偶值當途石蹙縮又縱橫有時遭
孔穴變作嗚咽聲褊淺無所用奔波奚所營團團井中

水不復東西征上應美人意中涵孤月明旋風四面起
井深波不生堅冰一時合并深凍不成終年汲引絕不
耗復不盈五月金石鑠既寒亦既清易時不易性改邑
不改名定如拱北極瑩若燒玉英君門客如水日夜隨
勢行君看守心者井水為君盟

四皓廟

巢由昔避世堯舜不得臣伊呂雖急病湯武乃可君四
賢胡為者千載名氛氲顯晦有遺跡前後疑不倫秦政

虐天下黷武窮生民諸侯戰必死壯士眉亦頰張良韓
孺子推辟屬車輪遂令英雄意日夜思報秦先生相將
去不復嬰世塵雲卷在孤岫龍潛為小鱗秦王轉無道
諫者鼎鑊親茅焦脫衣諫先生無一言趙高殺二世先
生如不聞劉項取天下先生遊白雲海內八年戰先生
全一身漢業日已定先生名亦振不得為濟世宜哉為
隱淪如何一朝起屈作儲貳賓安存孝惠帝推賴戚夫
人捨大以謀細虬盤而蠖伸惠帝竟不嗣呂氏禍有因

雖懷安劉志未若周與陳皆落子房術先生道何屯出
處貴明白故吾今有云

元氏長慶集卷一

欽定四庫全書

元氏長慶集卷二

唐 元稹 撰

古詩

青雲驛

崑崙青雲嶺下有千仞谿徘徊不可上人倦馬亦嘶願
登青雲路若望丹霞梯謂言青雲驛繡戶芙蓉閨謂言
青雲騎玉勒黃金蹄謂言青雲具瑚璉并象犀謂言青

雲吏的的顏如珪懷此青雲望安能復久棲路途信不
易風雨正淒淒已怪杜鵑鳥先來山下啼歸家塵霧黯
忽遇蓬蒿妻延我開華戶鑿竇宛如圭逡巡來叙別頭
白顏色鰥饋食頻叫噪假器仍乞醢嚮時延我者共拾
藿與藜乘我牂牯馬蒙茸大如羝悔為青雲意此意良
噬臍昔游蜀關下有驛名青泥聞名意慘愴若墜牢與
狴雲泥異所稱人物一以齊復聞閭閻上下視日月低
銀城藥珠殿玉版金字題大帝直南北羣仙侍東西龍

虎儼隊仗雷霆轟鼓輦元君理庭內左右桃花蹊丹霞
爛成綺素雲輕若綈天池光灑灑瑤草綠萋萋衆真千
萬輩柔顏盡如蕙手持鳳尾扇頭戴翠羽笄雲韶互鏗
夏霞服相提携雙雙發皓齒各各揚輕袿天祚樂未極
溟波浩無隄穢賤靈所惡安肯問黔黎桑田變成海寓
縣烹為壺虛皇不願見雲霧重重翳大帝安可夢閭闔
何由躋靈物可見者願以諭端倪蟲蛇吐雲氣妖氛變
虹蜺獲麟書諸冊泰龍醢為鷄音泥也鳳皇占梧桐叢雜

百鳥栖野鶴啄腥蟲貪饕不如雞山鹿藏窟穴虎豹吞
其麋靈物比靈境冠履寧甚睽道勝即為樂何慚居穉
穉金張好車馬於陵親灌畦在梁或在火不變玉與鵲
上天勿行行潛穴勿悽悽吟此青雲論達觀終不迷

陽城驛

商有陽城驛名同陽道州陽公沒已久感我淚交流昔
公孝父母行與曾閔儔既孤善兄弟兄弟和且柔一夕
不相見若懷三歲憂遂誓不婚娶沒齒同衾裯妹夫死

他縣遺骨無人收公令季弟往公與仲弟留相別竟不
得三人同遠遊共負他鄉骨歸來藏故丘棲遲居夏邑
邑人無苟媮里中競長短來問劣與優官刑一朝恥公
短終身羞公亦不遺布人自不盜牛問公何能爾忠信
先自修發言當道理不顧黨與讐聲香漸翕習冠蓋若
雲浮少者從公學老者從公遊往來相告報縣尹與公
侯名落公卿口湧如數萬舟天子得聞之書下再三求
書中願一見不異呈天虬何以持為聘東帛藉琳球何

以持為御駟馬駕安輶公云自挺操事殷不事周我實
唐士庶食唐之田疇我聞天子憶安敢專自由來為諫
大夫朝夕侍冕旒希夷惇薄俗密勿獻良籌神醫不言
術人瘼曾暗瘳月請諫官俸諸弟相對謀皆曰親戚外
酒散目前愁公云不有爾安得此嘉猷施餘盡沽酒客
來相獻酬日盱不謀食春深仍敝裘人心良戚戚我樂
獨油油貞元歲云暮朝有曲如鈞風波勢奔蹙日月光
綢繆齒牙屬為猾禾黍暗生蟲豈無司言者肉食吞其

喉豈無司搏者利柄扼如羈鼻復勢氣塞不得辯薰猶
公雖未顯諫惴惴如患瘤飛章八九上皆若珠暗投炎
炎日將熾積燎無人抽公乃帥其屬決諫同報仇延英
殿門外叩閣仍叩頭且曰事不止臣諫誓不休上知不
可遏命以美語酬降官司成署俾之為贅疣姦心不快
活擊刺礪戈矛終為道州去天道竟悠悠遂令不言者
反以言為訕喉舌坐成木鷹鷂化為鳩避權如避虎冠
豸如冠猴平生附我者詩人稱好逑私來一執手恐若

墜諸溝送我不出戶決我不迴眸惟有太學生各具糧
與糗咸言公去矣我亦去荒陬公與諸生別步步駐行
騶有生不可訣行行過閩甌為師得如此得為賢者不
道州聞公來鼓舞歌且謳昔公居夏邑狎人如狎鷗况
自為刺史豈復援鼓桴滋章一時罷教化天下道炎瘴
不得老英華忽已秋有烏哭楊震無免悲鄧攸惟餘門
弟子列樹松與楸今來過此驛若弔汨羅洲祠曹諱羊
祐此驛何不侔我願避公諱名為避賢郵此名有深意

蔽賢天所尤吾聞玄元教日月冥九幽幽陰蔽翳者永
為幽陰囚

苦雨

江瘴氣候惡庭空田地蕪煩昏一日內陰暗三四殊巢
燕汚牀席蒼蠅點肌膚不足生詬怒但苦寡歡娛夜來
稍清晏放體階前呼未飽風月思已為蚊蚋圖我受簪
組身我生天地爐炎蒸安敢勸蟲豸何時無凌晨坐堂
廡努力泥中趨官家事不了尤悔亦可虞門外竹橋折

馬驚不敢踰迴頭命僮御向我色踟躕自顧方獲落安
能相詰誅隱忍心憤恨翻為聲煦愉逡巡崔嵬日杲曜
東南隅已復雲蔽翳不使及泥塗良農盡蒲葦厚地積
潢污三光不得照萬物何由蘇安得飛廉車磔裂雲將
軀又提精陽劍蛟螭支節屠陰沴皆電掃幽妖亦雷驅
煌煌啟閭闔軋軋掉乾樞東西生日月晝夜如轉珠百
川朝巨海六龍蹋亨衢此意倍寥廓時來本須臾今也
泥鴻洞龜鼉真得途

種竹并序

昔樂天贈予詩云無波古井水有節秋竹竿予秋來種竹廳下因而有懷聊書十韻

昔公憐有直比之秋竹竿秋來苦相憶種竹廳前看失地顏色改傷根枝葉殘清風猶淅淅高節空團團鳴蟬聒暮景跳蛙集幽欄塵土復晝夜稍雲良獨難丹丘信云遠安得臨仙壇瘴江冬草綠何人驚歲寒可憐亭亭幹一一青琅玕孤鳳竟不至坐傷時節闌

和樂天贈樊著作

君為著作詩志激詞且溫璨然光揚者皆以義烈聞千
慮竟一失冰玉不斷痕謬予頑不肖列在數子間因君
譏史氏我亦能具陳義黃眇云遠載籍無遺文煌煌二
帝道鋪設在典墳堯心惟舜會因著為話言皋夔益稷
禹粗得無間然緬然千載後後聖曰孔宣迴知皇王意
綴書為百篇是時游夏輩不敢措舌端信哉作遺訓職
在聖與賢如何至近古史氏為閒官但令識字者竊弄

刀筆權由心書曲直不使當世觀貽之千萬代疑言相
並傳人人異所見各各私所偏以是曰褒貶不如都無
焉況乃丈夫志用捨貴當年顧予有微尚願以出處論
出非利吾已其出貴道全全道豈虛設道全當及人全
則富與壽虧則饑與寒遂我一身逸不如萬物安解懸
不澤手拯溺無折旋神哉伊尹心可以冠古先其次有
獨善善己不善民天地為一物死生為一源合雜分萬
變忽若風中塵抗哉巢由志堯舜不可遷捨此二者外

安用名為賓持謝著書郎愚不願有云

和樂天感鶴

我有所愛鶴毛羽霜雪妍秋望一滴露聲洞林外天自
隨衛侯去遂入大夫軒雲貌久已隔玉音無復傳吟君
感鶴操不覺心惕然無乃予所愛誤為微物遷因茲諭
直質未免柔細牽君看孤松樹左右蘿薦纏既可習為
飽亦可薰為荃期君常善救勿令終棄捐

諭寶二首

沉玉在弱泥泥弱玉易沈扶桑寒日薄不照萬丈心安
得潛淵虬拔壑超鄧林泥封泰山陞水散旱天霖洗此
泥下玉照耀臺殿深刻為傳國寶神器人不侵

冰置白玉壺始見清皎潔珠穿殷紅縷始見明洞澈鏤
鄒無人淬兩刃幽壤鐵秦鏡無人拭一片埋霧月驢蹄
環堵中骨附筋入節虬蟠尺澤內魚貫蛙同穴舩艤無
巨海浮浮矜濺滴棟梁無廣厦顛倒臥霜雪大鵬無長
空舉翮受羈絀豫樟無厚地危抵真宛艷圭璧無卞和

甘與頑石列舜禹無陶堯名隨腐草滅神功伏神物神
物神乃別神人不世出所以神功絕神物豈徒然用之
乃施設禹功九州理舜德天下悅璧用充傳璽圭用祈
太折千尋豫樟幹九萬大鵬歇棟梁庇生民餘鯢濟來
括虬騰旱天雨驪騁沅電掣鏡懸姦膽露劍拂妖蛇裂
珠生照乘光冰瑩環坐熱此物比在泥斯言為誰發于
今盡凡耳不為君陳說

說劍

吾友有寶劍密之如密友我實膠漆交中堂共盃酒酒
酣肝膽露恨不眼前剖高唱荆卿歌亂擊相如缶更擊
復更唱更舞亦更壽白虹坐上飛青虵匣中吼我聞音
響異疑是干將偶為君再拜言神物可見不君言我所
重我自為君取迎篋已焚香近鞘先澤手徐抽寸寸刃
漸屈彎彎肘殺殺霜在鋒團團月臨紐逡巡潛虬躍鬱
律驚左右霆電滿室光蛟龍逐奮走我為捧之泣此劍
別來久鑄時董山破藏在松桂朽幽質獄中埋神人水

心守本是稽泥滓果非雷渙有我欲評劍功願君良聽
受劍可刺犀兕劍可切瓊玖劍決天外雲劍衝日中斗
劍隳妖蛇腹劍拂佞臣首太古初斷鼉武王親擊紂燕
丹卷地圖陳平綰花綬曾被桂樹枝寒光射林藪曾經
鑄農器利用剪稂莠神物終變化復為龍北壯晉末武
庫燒脫然排戶牖為欲掃羣胡散作彌天帚自茲失所
往豪英共為詬音苟今復誰人鑄挺然千載後既非古風
胡無乃近鴟九自我與君遊平生益自負况擎寶劍出

重以雄心扣此劍何太奇此心何太厚勸君慎所寶所用無或苟潛將辟魑抽和切魑勿但驚妾婦留斬泓下蛟莫試街中狗君今困泥滓我亦全塵垢俗耳驚大言逢人少開口

書異


孟冬初寒月渚澤蒲尚青飄蕭北風起皓雪紛滿庭行過冬至後凍閉萬物零奔渾馳暴雨驟鼓轟雷霆傳云不終日通宵曾莫停瘴雲愁拂地急雷疑注瓶洶湧潢

潦濁噴薄鯨鯢腥跳趨井蛙喜突兀水怪形飛蚘奔不
死脩蛇蟄再醒應龍非時出無乃歲不寧吾聞陰陽戶
啟閉各有局後時無肅殺廢職乃玄冥座配五天帝薦
用百品珍權為祝融奪神其焉得靈春秋雷電異則必
書諸經仲冬雷雨苦願省蒙蔽刑

和樂天折劍頭

聞君得折劍一片雄心起詎意鐵蛟龍潛在延津水風
雲會一合呼吸期萬里雷震山嶽碎電斬鯨鯢死莫但

寶劍頭劍頭非此比



元氏長慶集卷二

欽定四庫全書

集部

元氏長慶集卷六

三至

詳校官監察御史臣查瑩

檢討臣何思鈞覆勘

總校官知縣臣繆琪

校對官中書臣雷純

謄錄監生臣陳山琨

欽定四庫全書

元氏長慶集卷二

唐 元稹 撰

古詩

松鶴

渚宮本坳下佛廟有臺閣臺下三四松低昂勢前却是
時晴景麗松梢殘雪薄白色相玲瓏纖雲映羅幕逡巡
九霄外似振風中鐸漸見尺帛光孤飛唳空鶴徘徊耀

霜雪顧慕下寥廓
跼動繆盤枝龍蛇
互跳躍俯瞰九江
水旁瞻萬里壑無
心盼烏鳶有字悲
城郭清角已沉絕
虞韶亦冥寞
翻勿重留幸及鈞
天作

競渡

吾觀競舟子因測
大競源天地昔將
競蓬勃晝夜昏龍
蛇相噴薄海岱俱
崩奔羣動皆攪繞
化作流渾渾數極
關心息大和蒸混
元一氣忽為二轟
然畫乾坤日月復
照曜春秋遞寒溫
八荒坦以曠萬物
羅以繁聖人中間

立理世了不煩延綿復幾歲逮及義與軒炎皇熾如炭
蚩尤扇其燔有熊競心起驅獸出林樊一戰波委焰再
戰火燎原戰訖天下定號之為軒轅自是豈無競瑣細
不復言其次有龍競競渡龍之門龍門浚如瀉滌射不
可援赤鱗化時至唐突鰭鬣掀乘風瞥然去萬里黃河
翻接瞬電烜出微吟霹靂喧傍瞻曠宇宙俯瞰卑崑崙
庶類咸在下九霄行易捫條辭蛙黽穴遽排天帝閭迴
悲曝鰓者未免鯨鯢吞帝命澤諸夏不棄蟲與昆隨時

布膏露稱物施厚恩草木霑我潤豚魚望我蕃嚮來同
競輩豈料由我存壯哉龍競渡一競身獨尊捨此皆蟻
鬬競舟何足論

寺院新竹

寶地琉璃圻紫苞琅玕踴亭亭巧於削一一大如拱冰
碧林外寒峯巒眼前聳槎音茶斜斫木牙音牙戟戟合屹魚乞切

仵

壯魚乞切貌

龍蛇動烟泛翠光流歲餘霜彩重風朝竿籟

過雨夜鬼神恐佳色有鮮妍脩莖無臃腫節高迷玉鏤

籜綴疑花捧詎必太山根本自仙壇種誰令植幽壤復
此依閒冗居然霄漢坐受藩籬壅噪集勸鴟烏炎昏
繁蠚螫未遭伶倫聽非安子猷寵威鳳來有時虛心豈
無奉

訓別致用

風行自委順雲合非有期神哉心相見無朕安得離我
有愬憤志三十無人知修身不言命謀道不擇時達則
濟億兆窮亦濟毫釐濟人無大小擔不空濟私研櫟未

淳熟與世忽參差意氣一為累猜仍良已隨昨來竄荆
蠻分與平生隙那言返為遇獲見心所奇一見肺肝盡
坦然無滯疑感念交契定淚流如斷縻此交定生死非
為論盛衰此契宗會極非謂同路岐君今虎在匣我亦
鷹就羈馴養保性命安能奮殊姿玉色深不變井水撓
不移相看各年少未敢深自悲

竹部

石首
縣界

竹部竹山近歲伐竹山竹伐竹歲亦深深林隔深谷朝

朝冰雪行夜夜豺狼宿料首霜斷蓬枯形燒去聲餘木一
束十餘莖千錢百餘束得錢盈千百得粟盈斗斛歸來
不買食父子分半菽持此欲何為官家歲輸促我來荆
門掾寓食公堂肉豈惟遍妻孥亦以及僮僕分爾有限
資飽我無端腹媿爾不復言爾生何太感

賽神

楚俗不事事巫風事妖神事妖結妖社不問疏與親年
年十月暮珠稻欲垂新家家不斂穫賽妖無富貧殺牛

貫官酒榷鼓集頑民喧闐里閭隘兌酤日夜頻歲暮雪
霜至稻珠隨隴湮吏來官稅迫求質倍稱緡貧者日消
鑠富亦無倉困不謂事神苦自言誠不真岳陽賢刺史
念此為俗屯未可一朝去俾之為等倫粗許存習俗不
得呼黨人但許一日澤不得月與旬吾聞國僑理三年
名乃振巫風燎原久未必憐徙薪我来歌此事非獨歌
政仁此事四隣有亦欲聞四隣

競舟

楚俗不愛力費力為競舟買舟俟一競競斂貧者賕年
年四五月蠶實麥小秋積水堰堤壞拔秧蒲稗稠此時
集丁壯習競南畝頭朝飲村社酒暮椎隣舍牛祭船如
祭祖習競如習讐連延數十日作業不復憂君侯饌良
吉會客陳膳羞畫鷁四來合大競長江流建標明取捨
勝負死生求一時謹呼罷三月農事休岳陽賢刺史念
此為俗疴習俗難盡去聊用去其尤百舩不留一一競
不滯留自為里中獻我亦不寓遊吾聞管仲教沐樹懲

墮遊節此淫競俗得為良政不我來歌此事非獨歌此
州此事數州有亦欲聞數州

茅舍

楚俗不理居居人盡茅舍茅苦竹梁棟茅疎竹仍罅邊
緣隄岸斜詰屈簷楹亞籬落不蔽肩街衢不容駕南風
五月盛時雨不來下竹蠹茅亦乾迎風自焚地

似也切
燈燭燼

防虞集隣里巡警勞晝夜遺燼一星然連延禍相嫁號
呼隣穀帛奔走伐桑柘舊架已新焚新茅又初架前日

洪州牧

韋大夫人

念此常嗟訝牧民未及久郡邑紛如化峻

邱儼相望飛

費

遠相跨旗亭紅粉泥佛廟青駕瓦斯

事纔未終斯人久云謝有客自洪來洪民至今藉惜其

心太亟作役無容暇臺觀亦已多工徒稍寃咤我欲他

郡長三時務耕稼農收次邑居先室後臺榭啟閉既及

期公私亦相偕度材無強畧庀役有定價不使及潛差

粗得禦寒夏火至殊陳鄭人安極嵩華誰能繼此名

流襲蘭麝五袴有前聞斯言我非詐

後湖

荆有泥淥水在荆之邑郢郢前水在後謂之為後湖環湖十餘里歲積潢與污臭腐魚鼈死不植菰與蒲鄭公理三載嚴司空艘其理用煦愉歲稔民四至隘廛亦隘衢公

乃署其地為民先矢謨人人謹自為我亦不庀徒下里得聞之各各相俞俞提攜翁及孫捧戴婦與姑壯者負礫石老亦捫茅葛斤磨片片雪椎隱連連珠朝餐布庭落夜宿完戶樞隣里近相告親戚遠相呼嚮者自為嚮

酤者自為酤雞犬豐中市人民岐下都百年廢滯所一
旦興浩區我實司水土得為官事無人言賤事貴貴直
不貴諛此實公所小安用歌袴襦荅云潭及廣以至鄂
與吳萬里盡澤國居人皆墊濡富者不容蓋貧者不庇
軀得不歌此事以我為楷模

八駿圖詩

并序

良馬無世無之然而終不得與八駿並名何也吾聞八
駿日行三萬里夫車行三萬里而無毀輪毀轅之患蓋

神車者行三萬里而無喪精褫魄之患亦神之人也無是三神而得是八馬乃破車掣御躋人之乘也世馬用之今夫畫古者畫馬而不畫車馭不畫所以乘馬者是不知夫古者也予因作詩以辯之

穆滿志空闊將行九州野神馭四來歸天與八駿馬龍種無凡性龍行無暫捨朝辭扶桑底暮宿崑崙下鼻息吼春雷蹄聲裂寒瓦尾掉滄波黑汗淞白雲赭華輶本脩密翠蓋尚妍冶御者腕不移乘者寐不假車無輪扁

斷轡無王良把雖有萬駿來誰是敢騎者

畫松

張璪

音早
玉飾

畫古松往往得神骨翠帚掃春風枯龍戛寒

月流傳畫師輩奇態盡埋沒纖枝無瀟灑頑幹空突兀
乃悟埃塵心難狀煙霄質我去浙陽山深山看真物

遣興十首

始見梨花房坐對梨花白行看梨葉青已復梨葉赤嚴
霜九月半危蒂幾時客況有高高原秋風四來迫

莫厭夏日長莫愁冬日短欲識短復長君看寒又暖城
中百萬家冤哀雜絲管草沒奉誠園軒車昔曾滿

孤竹迸荒園誤與蓬麻列久擁蕭蕭風空長高高節嚴
霜蕩羣穢蓬斷麻亦折獨立轉亭亭心期鳳皇別

艷艷剪紅英團團削翠莖託根在褊淺因依泥滓生中
有合歡藥池枯難遽呈涼宵露華重低徊當月明

晚荷猶展卷早蟬遽蕭嘹露葉行已重况乃江風搖炎
夏火再伏清商暗迴飈寄言抱志士日月東西跳

買馬買鋸牙買犢買破車養禽當養鵲種樹先種花人
生負俊健天意與光華莫學蚯蚓輩食泥近土涯

愛直莫愛夸愛疾莫愛斜愛謨莫愛詐愛施莫愛奢擇
才不求備任物不過涯用人如用已理國如理家

燿燿

音霍

刀刀光彎彎弓面張入水斬犀兕入山椎虎狼

里中無老少喚作癡兒郎一日風雲會橫行歸故鄉

團團規內星未必明如月托跡近北辰周天無淪沒老
人在南極地遠光不發見則壽聖明願照高高闕

河清諒嘉瑞

是歲黃河清

吾帝真聖人時哉不我夢此時為

廢民光陰本跳躑功業勞苦辛一到江陵郡三年成去
塵

野節鞭

神鞭鞭宇宙玉鞭鞭騏驎緊綬野節鞭本用鞭鼻

音鼻避屬

音戲作力貌

使君鞭甚長使君馬亦利司馬並馬行司馬馬

顛顛短鞭不可施疾步無由致使君駐馬言願以長鞭
遺山遺不尋常此鞭不容易金堅無繳遠玉滑無塵膩

青蛇圻生石不刺山阿地烏龜旋眼班不染紅頭淚長
看雷雨痕未忍駑駘試持用換所持無令等閒棄荅云
君何奇贈我君所貴我用亦不凡終身保明義誓以鞭
姦頑不以鞭蹇躓指撝狡兔蹤決捷怪平聲龍睡惜令寸
寸折節節不虛墜因作換鞭詩詩成謂同志而我得聞
之笑君年少意安用換長鞭鞭長亦奚為我有鞭尺餘
泥拋風雨漬不擬閒贈行惟將爛誇醉春來信馬頭款
緩花前轡願我遲似孿饒君疾如翅

元氏長慶集卷三

欽定四庫全書

元氏長慶集卷四

唐 元稹 撰

古詩

旱災自咎貽七縣宰

同州時

吾聞上帝心降命明且仁臣稹苟有罪胡不災我身胡
為旱一州禍此千萬人一旱猶可忍其旱亦已頻臘雪
不滿地膏雨不降春惻惻詔書下半減麥與緡半租豈

不薄尚竭力與筋竭力不敢憚慚戴天子恩累累婦拜
姑叻叻翁語孫禾黍日夜長足得盈我困還填折粟稅
酬償貫麥隣苟無公私責飲水不為貧歡言未盈口旱
氣已再振六月天不雨秋孟亦既旬區區昧陋積禱祝
非不勤日馳衰白顏再拜泥甲鱗歸來重思忖願告諸
邑君以彼天道遠豈如人事親團團囹圄中無乃冤不
申擾擾食廩內無乃姦有因軋軋輸送車無乃使不倫
遙遙負擔卒無乃役不均今年無大麥計與珠玉濱村

胥與里吏無乃求取繁符下斂錢急值官因酒嗔誅求
與撻罰無乃不遂巡生小下里住不曾州縣門訴詞千
萬恨無乃不得聞強豪富酒肉窮獨無葛薪俱由案牘
吏無乃移禍屯官分市井戶迭配水陸珍未蒙所償直
無乃不敢言有一於此事安可尤蒼旻偕使漏刑憲得
不虞鬼神自顧頑滯牧坐貽災沴臻上羞朝廷寄下愧
閭里民豈無神明宰為我同苦辛共布慈惠語慰此衢
客塵

蟲易詩七篇

并序○易音雉有
足曰蟲無足曰易

天之居物於地也有獸宜山宜穴魚宜水宜泥鳥宜木
宜洲蟲宜草宜腐穢風雨會而寒暑時山川正而原野
平行然後郭開屋室以州之人之宜人不得其宜而之
鳥獸蟲魚之所宜非蟲魚獸鳥之罪也然而自非聖賢
人失所宜未嘗無不得宜之歎云始辛卯年予掾荊州
之地洲渚濕墊其動物宜介其毛物宜翅羽予所舍又
荊州樹木洲渚處晝夜常有翅羽百族鬧心不得閑靜

因為有鳥二十章以自達又數年司馬通州郡通之地
叢穢卑褊烝瘴陰鬱炤為蟲蛇備有辛螫蛇之毒百而
鼻塞者尤之蟲之輩亦百而蝨蟻音浮塵蜘蛛蟻子蜾
蜂之類最甚害人其土民具能攻其所毒亦往往合於
方籍不知者遭輒死予因賦其七蟲為二十一章別為
序以脩瑣細之形狀而盡藥石之所宜庶亦叔敖之意
焉

巴蛇三首并序

巴之蛇百類其大蟒其毒塞鼻蟒人常不見塞鼻常遭
之毒人則毛髮皆豎起飲溪澗而泥沙盡沸驗方云攻
巨蟒用雄黃烟被其腦則裂而鶻音淫鳥能食其小者
巴無是物其民常用禁術制之尤効

巴蛇千種毒其最鼻塞蛇掉舌翻紅焰盤身感白花噴
人豎毛髮飲浪沸泥沙欲學叔敖瘞其如多似麻

越嶺南濱海武都西陷戎雄黃假名石鶻鳥遠難籠詎
有隳腸計應無破腦功巴山晝昏黑妖霧毒濛濛

漢帝斬蛇劒晉時燒上天自茲繁巨蟒往往壽千年白
晝遮長道青溪蒸毒烟戰龍蒼海外平地血浮舩

蛎蜂三首

并序

蛎蜂類而大巢在褰鼻蛇穴下故毒螫倍諸蜂蠆中手
足輒斷落及心胃則圯裂用它蜂中人之方療之不能
愈巴人往往持禁以制之則差

巴虵蟠窟穴下有巢蜂近樹禽垂翅依原獸絕蹤微
遭斷手足厚毒破心胸昔甚招魂句那知眼自逢

梨笑清都月

京開元觀
多梨花蜂

蜂遊紫殿春構脾分部伍嚼藥

奉君親翅羽頗同類心神固異倫安知人世裏不有噬

人人

蘭蕙本同畹蜂虺亦雜居害心俱毒螫妖焰兩吹噓雷
蟄吞噬止枯焚巢穴除可憐相濟惡勿謂禍無餘

蜘蛛三首 并序

巴蜘蛛大而毒其甚者身邊數寸而跖長數倍其身網
羅竹柏盡死中人瘡痛漶音集濕且痛癢倍常用雄黃苦

酒塗所嚙仍用鼠婦蟲食其絲盡輒愈療不速絲及心而療不及矣

蜘蛛天下足巴蜀就中多縫隙容長跼虛空織橫羅縈纏傷竹柏吞噬及蟲蛾為送佳人喜珠櫛無奈何

網密將求食絲斜誤著人因依方託緒挂胃遂容身截道蟬冠礙漫天玉露頻兒童憐小巧漸欲及車輪

稚子憐圓網佳人祝喜絲那知緣暗隙忽復嚙柔肌毒腠攻猶易焚心療恐遲看看長妖緒和扁欲連沔

蟻子三首 并序

巴蟻衆而善攻櫟棟往往木容完具而心節朽壞屋居者不省其微而禍成傾壓

蟻子生無處偏因濕處生陰靈煩擾攘拾粒苦詈諍音能

牀上主人病耳中虛藏鳴雷霆不省聞汝作牛聲

時術功雖細年深禍亦成攻穿漏江海嚼食困蛟鯨敢

憚攘櫟蠹深藏柱石傾寄言持重者微物莫全輕

攘攘終朝見悠悠卒歲疑詎能分牝牡焉得有蜾蠃音蜚

音池
蟻卵

從市竟何意生涯都幾時巢由或逢我應似我相

期

蟆子三首

并序

蟆蚊類也其實黑而小不礙紗縠夜伏而晝飛聞栢煙
與麝香輒去蚊蟆與浮塵皆巴蛇鱗中之細蟲耳故嚙
人成瘡秋夏不愈膏楸葉而傅之則差

蟆子微於蚋朝繁夜則無毫端生羽翼針喙嚼肌膚暗
毒應難免羸形日漸枯將身遠相就不敢恨非辜

晦景權藏毒明時敢噬人不勞生詬怒祇足助酸辛隼
皆看無物虵軀底有鱗天方芻狗我甘與爾相親

有口深堪異趨時詎可量誰令通鼻息何故辨馨香沉
水來滄海崇蘭泛露光那能枉焚爇爾衆我微茫

浮塵子三首

并序

浮塵螻類也其實微不可見與塵相浮而上下人苦之
往往蒙絮衣自蔽而浮塵輒能通透及人肌膚亦巢巴
虵鱗中故攻之用前術

可歎浮塵子纖埃喻此微寧論隔紗幌并解透綿衣有
毒能成瘡無聲不見飛病來雙眼暗何計辨雰霏

乍可巢蚊睫胡為附鱗鱗已微於蠹蠹仍害及人人動
植皆分命毫芒亦是身哀哉此幽物生死敵浮塵

但覺皮膚慚安知瑣細來因風吹薄霧向日誤輕埃暗
嚙堪銷骨潛飛有禍胎然無防備處留待雪霜摧

蟲三首 并序

巴山谷間春秋常雨自五六月至八九月雨則多蟲道

路羣飛噬馬牛血及蹄角旦暮尤極繁多人常用日中
時趣程速雪霜而後盡其害人痛劇浮蟻而不能毒留
肌故無療術

陰深山有瘴濕墊草多蝨衆噬錐刀毒羣飛風雨聲汗
粘瘡痛日曝苦辛行飽爾蛆殘腹安知天地情
千山溪沸石六月火燒雲自顧生無類那堪毒有羣搏
牛皮若截噬馬血成文蹄角尚如此肌膚安可云

辛螫終非久炎涼本遞興秋風自天落夏蘂與霜澄一

鏡開潭面千鋒露石稜氣平蟲豸音雄死雲路好攀登

楚歌十首

江陵時作

楚人千萬戶生死繫時君當璧便為嗣賢愚安可分干戈長浩浩篡亂亦紛紛縱有明在下區區何足云

陶虞事已遠尼父獨將明潛穴龍無位幽林蘭自生楚

王謀授邑此意復中傾未別子西語縱來何所成

平生漸昏惑無復轉承恩子建猶相貳伍奢安得存生

居宮雉悶死葬寢園尊豈料奔吳士鞭屍郢市門

懼盈因鄧曼罷獵為樊姬盛德留金石清風鑒薄帷襄
王忽妖夢宋玉復淫詞萬事捐宮館空山雲雨期

宜僚南市住未省食人恩臨難忽相感解紛寧用言何
如晉夷甫坐占紫微垣看著五胡亂清談空自尊

誰恃王深寵誰為楚上卿包胥心獨許連夜哭秦兵千
乘徒虛爾一夫安可輕殷勤聘名士莫但倚方城

梁業雄圖盡遺孫世運消宣明徒有號江漢不相朝碑
碣高臨路松枝半作樵惟餘開聖寺猶學武皇妖

江陵南北道長有遠人來死別登舟去生心上馬迴榮
枯誠異日今古盡同灰巫峽朝雲起荆王安在哉

三峽連天水奔波萬里來風濤各自急前後苦相推倒
入黃牛漩驚衝灩澦堆古今流不盡流去不曾迴

八荒同日月萬古共山川生死既由命興衰還付天
栖王粲賦憤憤屈平篇各自理幽恨江流終宛然

襄陽道

羊公名漸遠惟有峴山碑近日稱難繼曹王任馬羸
椒

蘭俱下世城郭到今時漢水清如玉流來本為誰

賦得魚登龍門

用登字

魚貫終何益龍門在此登有成當作雨無用恥為鵬激
浪誠難泝雄心亦自憑風雲潛會合鬚鬣忽騰凌泥滓
辭河濁煙霄見海澄迴瞻順流輩誰敢望同升

永貞歷

是歲秋八月太上改元永貞傳位今皇帝

象魏纔頒歷龍鑣已御天猶看後元歷新署永貞年半
歲光陰在三朝禮數遷無因書簡冊空得詠詩篇

塞馬

塞馬倦江渚今朝神彩生
曉風寒獵獵乍得草頭行
夷狄寢烽候關河無戰聲
何由當陣面從爾四蹄輕

鹿角鎮

洞庭湖
中地名

去年湖水滿此地覆行舟
萬怪吹高浪千人死亂流
誰能問帝子何事寵陽侯
漸恐鯨鯢大波濤及九州

感事三首

此後並是
學士時詩

為國謀羊舌從來不為身
此心長自保終不學張陳

自笑心何劣區區辨所寃伯仁雖到死終不向人言
富貴年皆長風塵舊轉移白頭方見絕遙為一霑衣

題翰林東閣前小松

蒼巖脩鱗亞霜侵簇翠黃惟餘入琴韻終待舜絃張

元氏長慶集卷四

欽定四庫全書

元氏長慶集卷五

唐 元稹 撰

古體詩

清都夜境

自此至秋夕七首並
年十六至十八時作

夜久連觀靜斜月何晶熒寥天如碧玉歷歷綴華星樓
榭自陰映雲牖深冥冥纖埃悄不起玉砌寒光清栖鶴
露微影枯松多怪形南廂廡容衛音響如可聆啓聖發

空洞朝真趨廣庭間開藥珠殿暗閱金字經屏風動方
息凝神心自靈悠悠車上馬浩思安得寧

春晚寄楊十二兼呈趙八

時楊生館於趙氏

蒙蒙竹樹深簾幙多清陰避日坐林影餘花委芳襟傾
樽就殘酌舒卷續微吟空際颺高蝶風中聆素琴廣庭
備幽趣復對商山岑獨此愛時景曠懷雲外心遷鶯戀
嘉木求友多好音自無琅玕實安得蓮花簪寄之二君
子希見雙南金

與楊十二李三早入永壽寺看牡丹

曉入白蓮宮琉璃花界淨開敷多喻草凌亂被幽徑壓
砌錦地鋪當霞日輪映蝶舞香暫飄蜂牽藥難正籠處
綵雲合露湛紅珠瑩鳥迥切結葉影自交搖風光不定繁
華有時節安得保全盛色見盡浮榮希君了真性

春餘遣興

春去日漸遲庭空草偏長餘英間初實雪絮繁珠網好
鳥多息陰新篁已成響簾開斜照入樹裊游絲上絕跡

念物閒良時契心賞單衣頗新綽虛室復清敞置酒奉
親賓樹萱自怡養笑倚連枝花恭扶瑞藤杖步履恣優
游望山多氣象雲葉遙卷舒風裾動蕭爽簪纓固煩雜
江海徒浩蕩野馬籠赤霄無由負羈鞅

憶雲之

為魚實愛泉食辛寧避蓼人生既相合不復論窈窕滄
海良有窮白日非長皎何事二人心各在四方表泛若
逐水萍居為附松蔦流浪隨所之縈紆牽所繞百齡頗

跼促況復迷壽夭
芟髮君已衰冠歲
予非小娛樂不及
時暮年壯心少感
此幽念綿遂為長
悄悄中庭草木春
歷亂遞相擾奇樹
花冥冥竹竿鳳裊
裊幽芳被蘭徑安
得寄天杪萬里瀟
湘魂夜夜南枝鳥

別李三

階蔭附瑤砌藟蘭
偶芳藿高位良有
依幽姿亦相託鮑
叔知我貧烹葵不
為薄半面契始終
千金比然諾人生
繫時命安得無苦
樂但感遊子顏又
值餘英落蒼蒼秦

樹雲去去縵山鶴日暮分手歸楊花滿城郭

秋夕遠懷

旦夕天氣爽風飄葉漸輕星繁河漢白露逼衾枕清丹
鳥月中滅莎雞牀下鳴悠悠此懷抱况復多遠情

東西道

天皇開四極便有東西道萬古閱行人行人幾人老顧
我倦行者息陰何不早少壯塵事多那言壯年好

分流水

古時愁別淚滴作分流水日夜東西流分派幾千里通
塞雨不見波瀾各自起與君相背飛去去心如此

西還

悠悠洛陽夢鬱鬱灞陵樹落日正西歸逢君又東去

含風夕

此後拾遺時作

炎昏勸煩久逮此含風夕夏服稍輕清秋堂已岑寂載
欣涼宇曠復念佳辰擲絡緯驚歲功顧我何成績青瑩
微月鈎幽暉洞陰鬼水鏡涵玉輪若見淵泉壁參差簾

蟪重次第籠虛白樹影滿空牀螢光綴深壁悵望牛斗
星復為經年隔露網裊風珠輕河泛遙碧詎無深稠景
感此年流易亦有遲暮年壯年良自惜循環切中感感
今追往昔接瞬無停陰何言問陳積馨香推蕙蘭堅貞
諭松栢生物固有涯安能比金石况茲百齡內擾擾紛
衆役日月東西馳飛車無留跡來者良未窮去矣定奚
適委順在物為營營復何益

秋堂夕

炎涼正迴互金火鬱相乘雲雷暗交構川澤方蒸騰清
風一朝勝白雲忽已疑草木凡氣盡始見天地澄況此
秋堂夕幽懷曠無朋蕭條簾外雨條閃案前燈書卷滿
牀席蠟蛸懸復升啼兒屢啞咽勸僮時寢興泛覽昏夜
目詠謠暢煩膺况吟獲麟章欲罷久不能堯舜事已遠
丘道安可勝蜉蝣不信鶴蜩鷄肯窺鵬當年且不偶歿
世何必稱胡為揭聞見褒貶貽愛憎焉用汨其泥豈在
清如水非白又非黑誰能點青蠅處世苟無悶佯狂道

非弘無言被人覺予亦笑孫登

酬樂天

時樂天攝尉
予為拾遺

放鶴在深水置魚在高枝升沉或異勢同謂非所宜君
為邑中吏皎皎鸞鳳姿顧我何為者翻侍白玉墀昔作
芸香侶三載不暫離遲茲忽相失旦夕夢魂思崔魏驪
山頂宮樹遙參差祇得兩相望不得長相隨多君歲寒
意裁作秋興詩上有風塵苦下言時節移官家事拘束
安得攜手期願為雲與雨會合天之垂

楊子華畫三首

楊畫遠於展何言今在茲依然古粧服但感時節移念
君一朝意遺我千載思子亦幾時客安能長苦悲

皓腕卷紅袖錦鞬臂蒼鶚故人斷絃心稚齒從禽樂當
年惜貴遊遺形寄丹牘骨象或依稀鉛華已寥落似對
古人民無復昔城郭子亦觀病身色空俱寂寞

顛倒世人心紛紛乏公是真賞畫不成畫賞真相似丹
青各所尚工拙何足恃求此妄中精哀哉子華子

西州院

東川官舍。時公以
監察御史按山東獄。

卷五

自入西州院，惟見東川城。
今夜城頭月，非暗又非明。
文案牀席滿，卷舒賦罪名。
慘淒且煩勸，棄之階下行。
悵望天迴轉，動搖萬里情。
參辰次第出，牛女顛倒傾。
況此風中柳，枝條千萬莖。
到來籬下筍，亦以長短生。
感愴正多緒，鴉鵲相喚驚。
牆上杜鵑鳥，又作思歸鳴。
以彼撩亂思，吟為幽怨聲。
吟罷終不寢，嚳嚳復鐺鐺。

抽庚切

臺中鞠獄憶開元，觀舊事呈損之兼贈周兄四

十韻

憶在開元觀食栢練玉顏疎慵

常客切

日高臥自謂輕人

竄李生隔牆住隔牆如隔山怪我久不識先來問驕頑

十過乃一往遂成相往還以我文章卷文章甚編

音班爛

因言辛庾輩亦願放羸羸既迴數子顧展轉相連攀驅

令選科目若在關與關學隨塵土墜漫數公卿關惟恐

壞情性安能懼謗訕還招辛庾李靜處盃巡環進取果

由命不由趨險艱穿楊二三子弓矢次第彎推我亦上

道再聯朝士班二月除御史三月使巴蠻

按獄東川

蠻民詰

竹感反

誦訴嚙指明痛癢

與癢同

憐蠻不解語為發昏聾姦

勅奏節度使嚴礪違詔過賦數百萬

歸來五六月旱色天地殷分司

時礪黨擯

公俄分司東都

別兄弟各各淚潛潛哀哉劇部職惟數賊罪緩

死款依稀取鬪辭方便刪道心常自愧柔髮難久黧鵝

切黑色

折支望車乘支痛誰置患奇哉乳臭兒緋紫襦被

間漸大官漸貴漸富心漸慳開裝轡頭觸

音決環有舌者

靜拭

腰帶斑鷄子繡線韞

音宅刀飾

狗

同狗

兜金油

去聲

鑲香湯洗驄

馬翠篋籠白鷗月請公主封冰受天子頒開筵試歌舞

別宅寵妖嬈坐臥摩綿褥捧擁綰

音側艾草可以染絲因以名綰

絲鬟

旦夕不相離比翼若飛鸞而我亦何苦三十身已鰥愁

吟心骨顫寒臥支體瘳

五闕反又渠云反

居處雖幽靜尤悔少

愉懽

與懶同

不如周道士鶴嶺臨潼灣繞院松瑟瑟通畦

水潺潺陽坡自尋蕨村沼看漚管窮通兩未遂營營真

老閒

韋氏館與周隱客杜歸和泛舟

天色低澹澹池光漫油油輕舟閒繳繞不遠池上樓時
物欣外獎真元隨內修神怡津藏滿氣委支節柔衆處
豈自異曠懷誰我儔風車籠野馬八荒安足遊開顏陸
渾杜握手靈都周持君寶珠贈頂戴頭上頭

劉氏館集隱客歸和子元及之子蒙晦之

濕墊綠竹徑寥落護岸冰偶然沽市酒不越四五升詩
客愛時景道人話升騰笑言各有趣悠哉古孫登

寄隱客

我年三十二鬢有八九絲非無官次第其如身早衰今
人夸貴富肉食與妖姬而我俱不樂貴富亦何為况逢
多士朝賢俊若布棊班行次第立朱紫相參差謨猷密
勿進羽檄縱橫馳監察官甚小發言無所裨小官仍不
了譴奪亦已隨時或不之棄得不自棄之陶君喜不遇
顧我復何疑潛書周隱士白雲今有期

元和五年予官不了罰俸西歸

時公分司東都
勅河南尹房式

詔薄式罪
名公還京

三月六日至陝府與吳十一兄端公

崔二十二院長思愴曩游因投五十韻

小年閒愛春認得春風意未有花草時先醺曉窓睡霞
朝澹雲色霽景牽詩思漸到柳枝頭川光始明媚長安
車馬客傾心奉權貴晝夜塵土中那言早春至此時我
獨遊我遊有倫次閒行曲江岸便宿慈恩寺扣林引寒
龜疏叢出幽翠凌晨過杏園曉露凝芳氣初暘好明淨
嫩樹憐低庠排房似綴珠欲啼紅臉淚新鶯語嬌小淺
水光流利冷飲空腹孟因成日高醉酒醒聞飯鍾隨僧

受遺施餐罷還復遊過從上文記行逢二月半始足遊
春騎是時春已老我遊亦云既藤開九華觀草結三條
隧新筍踴屏株落梅翻蝶翅名倡繡轂車公子青絲轡
朝士遇旬休豪家得春賜提携好音樂剪鑿空田地同
占杏花園喧闌各叢萃顧予煩寢興復往散憔悴倦僕
色肌羸蹇驢行跛痺春衫未成就冬服漸塵膩傾蓋吟
短草書空憶難字遙聞公主笑近被王孫戲邀我上華
筵橫頭坐賓位那知我年少深解酒中事能唱犯聲歌

偏精變籌義含詞待殘拍促舞遞繁吹叫噪擲投盤生

獐

音能惡也

攝觥使逡巡光景晏散亂東西異古觀閉閒門

依然復幽閤無端矯情性漫學求科試薄藝何足云虛

名偶頻遂拾遺天子前密奏升平議召見不須臾儉庸

已猜忌朝陪香案班暮作風塵尉

元和元年為左拾遺尋出為河南尉

去

歲又登朝

元和四年母喪服闋拜御史

登為栢臺吏臺官相束縛不

許放情志寓直勞送迎上堂煩避諱分司在東洛所職

尤不易罰俸得西歸心知受朝庇常山攻小寇淮右擇

良帥國難身不行勞生欲何為吾兄諳性靈崔子同臭味投此挂冠詞一生還自恣

元氏長慶集卷五

欽定四庫全書卷

元氏長慶集卷六

唐 元稹 撰

古體詩

寄吳士矩端公五十韻

此後並江陵士曹時作

昔在鳳翔日十歲即相識
未有好文章逢人賞顏色可

憐何郎面

吳生小字何郎

二十纔冠飾短髮予近梳羅衫紫蟬

翼伯舅各驕縱仁兄未摧抑
事業若孟盤詩書甚徽纒

西州戎馬地賢豪事雄特百萬時可贏十千良易借

資昔

切假也

寒食桐陰下春風柳林側藉草送遠遊列筵酬博

塞萎蕤雲幕翠爛紅茵

迺力切大赤

鱸縷輕似絲香醅

膩如織將軍頻下城佳人盡傾國媚語嬌不聞纖腰軟

無力歌辭妙宛轉舞態能宛轉第弦玉指調粉汗紅綃

拭予時最年少專務酒中職未能媿生獐

音能

偏矜任狂

直曲庇桃根盞橫講指雲式亂布鬪分朋惟新間讒慝

恥作最先吐羞言未朝食醉眼漸紛紛酒聲頻餞餞

愛黑

反

扣節參差亂飛觥往來織強起相維持翻成兩匍匐

步黑反

邊霜颯然降戰馬鳴不息但喜秋光麗誰憂塞雲

黑常隨獵騎走多在豪家匿夜飲天旣明朝歌日還景
荒狂歲云久名利心潛逼時輩多得途親朋屢相勅閒
因適農野忽復愛稼穡平生中聖人翻然腐腸賊亦從
酒仙去便被書魔惑脫跡壯士場甘心豎儒域矜持翠
筠管敲斷黃金勒屢益蘭膏燈猶研兔枝墨崎嶇來掉
蕩矯枉事沈默隱笑甚艱難斂容還芳

音勒又
音寂

崩

疾力
切大

也與君始分散勉我勞修飾岐路各營營別離長惻惻
行看二十載萬事絲何極相值或須臾安能洞胃臆昨
來陝郊會悲歡兩難克問我新相知但報長相憶豈無
新知者不及小相得亦有生歲游同年不同德為別詎
幾時伊予墜溝洫大江鼓風浪遠道參荆棘往事返無
期前途浩難測一旦得自由相求北山北

三月二十四日宿曾峯館夜對桐花寄樂天

微月照桐花月微花漠漠怨澹不勝情低徊拂簾幕葉

新陰影細露重枝條弱夜久春恨多風清暗香薄是夕
遠思君思君瘦如削但感事睽違非言官好惡奏書金
鑾殿步履青龍閣我在山館中滿地桐花落

酬樂天書懷見寄

本題云初與微之別後忽夢見之及寤而微之書至兼覽

桐花之什悵然書懷此
後五章並次用本韻

新昌北門外與君從此分街衢走車馬塵土不見君君
為分手歸我行行不息我上秦嶺南君直樞星北秦嶺
高崔嵬商山好顏色月照山館花栽詩寄相憶天明作

詩罷草草從所如憑人寄將去三月無報書荊州白日
晚城上鼓鼙鼙行逢賀州牧致書三四封封題樂天寄
未圻已霑裳圻書八九讀淚落千萬行中有酬我詩句
句截我腸仍云得詩夜夢我魂淒涼終言作書處上直
金鑾東詩書費一夕萬恨絨其中中宵宮中出復見宮
月斜書罷月亦落曉燈垂暗花想君書罷時南望勞所
思況我江上立吟君懷我詩懷我浩無極江水秋正深
清見萬丈底照我平生心感君求友什因報壯士吟持

謝衆人口銷盡猶是金

酬樂天登樂遊園見憶

昔君樂遊園悵望天欲曛
今我大江上快意波飈雲
秋空壓澶漫瀕洞無垢氛
四顧皆豁達我眉今日伸
長安隘朝市百道走埃塵
軒車隨對列骨肉非本親
誇遊丞相第偷入常侍門
愛君直如髮勿念江湖人

酬樂天早夏見懷

庭柚有垂實鶯巢無宿雛
我亦辭社鶯茫茫馬所如
君

詩夏方早我歎秋已徂食物風土異衾裯時節殊荒草
滿田地近移江上居八日復切九月明侵半除

酬樂天勸醉

神麴清濁酒牡丹深淺花少年欲相飲此樂何可涯沈
機造神境不必悟楞迦醅顏返童貌安用成丹砂劉伶
稱酒德所稱良未多願君聽此曲我為盡稱嗟一杯顏
色好十盞膽氣加半酣得自恣酩酊歸太和共醉真可
樂飛觥撩亂歌獨醉亦有趣兀然無與他美人醉燈下

左右流橫波王孫醉牀上顛倒眠綺羅君今勸我醉勸
醉意如何

和樂天初授戶曹喜而言志

樂天為左拾遺歲
滿當遷帝以資淺

且家貧聽自擇官樂天請以翰林學
士兼京兆戶曹參軍以便養詔可

王爵無細大得請即為恩君求戶曹掾貴以祿奉親聞
君得所請感我欲霑巾今人重軒冕所重華與紛矜誇
仕臺閣奔走無朝昏君衣不盈篋君食不滿困君言養
既薄何以榮我門披誠再三請天子憐儉貧詞曹直文

金匱要略卷六
苑捧詔榮且忻歸來高堂上兄弟羅酒樽各稱千萬壽
共飲三四巡我實知君者千里能具陳感君求祿意求
祿殊衆人上以奉顏色餘以及親賓棄名不棄實謀養
不謀身可憐白華士永願凌青雲

和樂天贈吳丹

不識吳生面久知吳生道跡雖染世名心本奉天老雌
一守命門迴九填血腦委氣榮衛和咽津顏色好傳聞
共甲子衰隤盡枯槁獨有冰雪容纖華奪鮮縞問人何

能爾吳寶曠懷抱弁冕徒挂身身外非所寶伊予固童
昧希真亦云早石壇玉晨尊晝夜長自掃密印視丹田
遊神夢三島萬過黃庭經一食青精稻冥搜方朔桃結
念安期棗綠髮幸未改丹誠自能保行當擺塵纓吳門
事探討君為先此詞終期塞瑤草

和樂天秋題曲江

十載定交契七年鎮相隨長安最多處多是曲江池梅
杏春尚小芰荷秋已衰共愛寥落境相將偏此時綿綿

紅蓼水鷗鷺白鷺鷥詩句偶未得酒盃聊久持今來雲
雨曠舊賞魂夢知況乃江楓夕和君秋興詩

和樂天別弟後月夜作

聞君別愛弟明天照夜寒秋雁拂簷影曉琴當砌彈悵
望天澹澹因思路漫漫吟為別弟操聞者為辛酸況我
兄弟遠一身形影單江波浩無極但見時歲闌

和樂天秋題牡丹叢

敝宅豔山卉別來長歎息吟君晚叢詠似見摧墮色欲

識別後容勤過晚叢側

春月

春月雖至明終有靄靄光不似秋冬色逼人寒帶霜纖
粉澹虛壁輕烟籠半牀分暉間林影餘照上虹梁病久
塵事隔夜閒清興長擁袍顛倒領步履東西廂風柳結
柔援露梅飄暗香雪含櫻綻藥珠蹙桃綴房杳杳有餘
思行行安可忘四隣非舊識無以話中腸南有居士儼
默坐調心王款關一問訊為我披衣裳延我入深竹暖

我於小堂視身琉璃瑩音詠諭指芭蕉黃復有比丘溢早

傳龍樹方口中秘丹訣肘後懸青囊錫杖雖獨振刀圭

期共嘗未知仙近遠已覺人輕翔夜久魂耿耿月明露
蒼蒼悲哉沈眠士寧見茲夕良

月臨花

即林檎花

凌風颺颺花透影朧朧月巫峽隔波雲姑峯漏霞雪鏡

勻嬌面粉燈泛高籠纈

胡結切繫也

夜久清露多啼珠墜還

結

紅芍藥

芍藥綻紅綃
巴籬織青瑣
繁絲蹙金蘂
高焰當爐火
剪刻彤雲片
開張赤霞褱
烟輕琉璃葉
風亞珊瑚朵
受露色低迷
向人嬌婀娜
醺顏醉後並
小女妝成坐
豔豔錦不如
天天桃未可
晴霞畏欲散
晚日愁將墮
結植本為誰
賞心期在我
採之諒多思
幽贈何由果

送王十一南行

夏水漾天末
晚暘映遙村
風翻烏尾勁
眷戀餘芳樽
解

袂方瞬息征帆已翩翻江豚湧高浪槐樹搖去魂遠戍
宗侶泊暮烟洲渚昏離心詎幾許歸苦復寒溫此別信
非久胡為坐憂煩我留石難轉君泛雲無根萬里湖南
月三聲山上猿從茲耿幽夢夜夜湘與沅

三歎三首

孤劒鋒刃澁猶能神彩生有時雷雨過暗吼闐闐聲主
人悶靈寶畏作升天行淬礪當陽鐵刻為千鎔名遠求

鵬

音提
鵬 音提
水鳥聲

瑩

去聲

同用玉匣盛顏色縱相類利鈍頗相

傾雄為光電燄

抽延切
火光

雌但深泓澄龍怒有奇變青蛇

終不驚

金鳳翠皇死歲凝光彩低非無鴛鴦侶誓不同樹棲飛
馳歲云暮感念離在泥顧影不自暖寄爾蟠桃雞馴養
豈無媿類族安得齊願言成羽翼奮翅凌丹梯

天驥失龍偶三年常夜嘶哀緣噴風斷渴且含霜啼長
恐絕遺類不復躡雲霓非無駟駟者鶴意不在雞春來
筋骨瘦弔影心亦迷自此渥洼種應生濁水泥

遺畫

密竹有清陰曠懷無塵滓況乃秋日光玲瓏曉牕裏旬
休聊自適今辰日高起櫛沐坐前軒風輕鏡如水開卷
恣詠謠望雲閒徙倚新菊媚鮮妍短萍憐霍霍同靡掃除
田地靜摘掇園蔬美幽翫愜詩流空堂稱居士客來傷
寂寞我念遺煩鄙心跡兩相忘誰能驗行止

冬夜懷李侍御王太祝段丞

浩露烟瑩

音愛

盡月光閒有餘松篁細陰影重以簾牖疎

泛覽星粲粲輕河悠碧虛纖雲不成葉脈脈風絲紆丹
竈熾東序燒香羅玉書飄飄魂神舉若駢鸞鶴輿感念
夙昔意華尚簪與裾簪裾詎幾許累創吞鉤魚令聞馨
香道一以悟臭帑女居切悟覺哲不惑永抱胎仙居晝
夜欣所適安知歲云除行行二三友君懷復何如

西齋小松二首

松樹短於我清風亦已多況乃枝上雪動搖微月波幽
姿得閒地詎感歲蹉跎但恐厦終構藉君當奈何

簇簇枝新黃纖纖攢素指柔荑漸依條短莎還半萎清
風日夜高凌雲竟何已千歲盤老龍修鱗自茲始

周先生

寥寥空山岑冷冷風松林流月垂鱗光懸泉揚高音希
夷周先生燒香調琴心神功盈三千誰能還黃金

元氏長慶集卷六